

Na osnovu člana 13. Zakona o principima lokalne samouprave u Federaciji BiH (Službene novine Federacije BiH“, broj: 49./06), te člana 26. stav 1. Statuta općine Tuzla („Službeni glasnik općine Tuzla, broj 2/99, 9/00, 2/08 i 12/09) Općinsko vijeće Tuzla na sjednici održanoj dana, 28. 03. 2012 godine, d o n o s i

KODEKS *ponašanja vijećnika u Općinskom vijeću Tuzla*

POGLAVLJE I - OPŠTE ODREDBE

Član 1. *Definicija vijećnika*

U smislu ovog Kodeksa, termin "vijećnik“ označava neposredno izabranog predstavnika građana, koji ima mandat dobiven na lokalnih izborima, neposrednim i tajnim glasanjem od strane birača sa pravom glasa i koji je kao takav utvrđen i dodijeljen aktom nadležnog tijela za provođenje izbora u skladu sa Zakonom .

Član 2. *Ciljevi Kodeksa*

Ciljevi ovog Kodeksa su preciziranje standarda ponašanja koji se očekuju od vijećnika u obavljanju njihovih dužnosti, jačanje povjerenja, unaprjeđenje osobnog i političkog integriteta, podizanje autoriteta Općinskog vijeća Tuzla i informiranje građana o standardima ponašanja koje oni imaju pravo da očekuju od vijećnika, kao svojih izabranih predstavnika.

Član 3. *Područje Primjene*

Ovaj se Kodeks odnosi na vijećnike Općinskog vijeća Tuzla.
Principi ponašanja ustanovljeni ovim Kodeksom će se primjenjivati na sjednicama Općinskog vijeća Tuzla, sjednicama njegovih radnih tijela i prilikom i u drugim prilikama, koje tretira ovaj Kodeks.

POGLAVLJE II – STANDARDI PONAŠANJA VIJEĆNIKA

Član 4 *Primat zakona i opšteg interesa*

Vijećnici su dužni, da obavljaju svoju funkciju u skladu sa Ustavom, zakonom i važećim propisima.

Vijećnici će u svom djelovanju uvijek postupati u skladu sa općim interesom koji isključuje rad za finansijsku dobit ili bilo koju direktnu ili indirektnu novčanu korist za sebe ili lica iz svog privatnog okruženja izuzev naknada za svoj rad utvrđenih odlukom Vijeća ili radnog tijela Vijeća.

Vijećnici će se posebno suzdržavati od svih aktivnosti, koje bi trebalo da rezultiraju izborom, imenovanjem ili postavljanjem lica na određene pozicije, a da se pri tome ne sprovode propisi, ne obezbijedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja i sposobnosti.

Član 5. ***Zabrana korupcije***

Vijećnici će u obavljanju svoje funkcije suzdržavati od bilo kakvog ponašanja koje bi, po važećem domaćem ili međunarodnom krivičnom zakonodavstvu, moglo da se okarakteriše kao aktivno ili pasivno podmićivanje.

Član 6. ***Savjesnost i odgovornost u obavljanju funkcije vijećnika***

Vijećnici će svoju funkciju obavljati savjesno, uz otvorenost i spremnost da odgovaraju za svoje odluke te imati na umu da su izabrani predstavnici svih građana u općini Tuzla.

Na sjednicama Općinskog vijeća Tuzla i njegovih radnih tijela, vijećnici će se u svemu pridržavati odredbi Poslovnika Općinskog vijeća Tuzla, odnosno Poslovnika radnog tijela (komisije ili drugog radnog tijela).

Poštujući propisane obaveze, vijećnici su dužni prisustvovati sjednicama Općinskog vijeća i tijela čiji su članovi. Vijećnici neće napuštati zasjedanje prije završetka a ni tokom trajanja sjednice, a da prije toga ne saopšte javno ili predsjedavajućem razlog povremenog ili potpunog napuštanja zasjedanja. Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, predsjedavajućem će saopštiti te razloge, a on će Vijeće, tijelo i forum obavijestiti o razlogu izostanka pozvanog vijećnika.

Vijećnici neće bez opravdanog razloga izostajati sa javnih manifestacija ili javnih skupova na koje su uredno i blagovremeno pozvani u svojstvu izabranog predstavnika.

Član 7. ***Posebna odgovornost u upravljanju resursima***

Vijećnici će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom općine, isključivo u skladu sa propisima i općim interesom. Svojim ponašanjem neće dati povoda, niti aktivno ili pasivno učestvovati u pripremanju ili podsticati donošenje nezakonitih i nepravilnih odluka koje bi mogle donijeti lične koristi

ili ostvarenja nečijeg privatnog interesa sa kojim su povezani finansijskim ili nekim drugim interesom.

Član 8.

Uzajamno poštovanje i uvažavanje

U međusobnoj komunikaciji i uopšte komunikaciji sa javnošću izabrani predstavnici – vijećnici će u svakom slučaju, uključivši sjednice Vijeća i njegovih radnih tijela istupati sa uvažavanjem i poštovanjem, izbjegavajući korištenje izraza koji mogu omalovažavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.

Član 9.

Izbjegavanje sukoba interesa

Vijećnici su dužni pridržavati se odredaba Zakona o sukobu interesa i drugih zakona koji uređuju nespojivost funkcija izabranog predstavnika sa funkcijom ili položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, izabrani predstavnik – vijećnik će u najkraćem roku prijaviti takav slučaj i odstupiti sa pozicije.

Vijećnik će u svakom slučaju tokom vijećanja prijaviti slučaj sukoba interesa, ako se razmatra određeni akt koji treba da bude usvojen i po kome bi on, ili lice iz njegovog privatnog okruženja, ili pravni subjekt u kome ima finansijski ili drugi interes, trebalo da ostvari kakvu korist ili privilegiju protivno Zakonu o sukobu interesa i prilikom odlučivanja će se izuzeti od izjašnjavanja.

POGLAVLJE III – MEĐUSOBNI ODNOSI VIJEĆNIKA I UPOSLENIH U OPĆINSKOJ UPRAVI

Član 10.

Međusobna saradnja i uvažavanje

Odnosi između vijećnika i uposlenika u organima uprave Općine Tuzla, zasnivaju se na međusobnoj saradnji i uvažavanju, uz poštovanje Ustava, zakona i općinskih propisa.

Član 11.

Poštovanje uloge zaposlenih u lokalnoj upravi

U obavljanju svoje funkcije, vijećnici će uvažavati ulogu i odgovornost uposlenika u organima uprave Općine Tuzla, bez predrasuda u pogledu izvršavanja poslova i radnih zadataka, koji su im povjereni.

Oni neće zahtijevati od zaposlenih u upravi da preduzimaju ili da propuste da preduzmu bilo kakve radnje, kojima bi sebi omogućili protivpropisnu direktnu ili indirektnu ličnu prednost, ili dali prednost pojedincima ili grupama pojedinaca, sa ciljem ostvarivanja protivpropisne direktne ili indirektno lične koristi ili u svrhu ostvarivanja političkih ciljeva, onih političkih grupacija kojima pripadaju.

POGLAVLJE IV – ODNOSI SA MEDIJIMA

Član 12.

Otvorenost i odnosi sa medijima

Vijećnici će u svom djelovanju i u vezi sa svojim odlukama koje donose uvijek biti otvoreni i nijednom svojom aktivnošću neće izbjegavati da jasno i javno saopšte svoje stavove i razloge za sopstvene odluke i ponašanja.

Član 13.

Zakonitost i poštenje u iznošenju informacija

Prema zahtjevima medija će pošteno i u potpunosti pružati informacije vezane za obavljanje njihovih dužnosti i neće pružiti nijednu informaciju, koja predstavlja službenu, državnu ili vojnu tajnu ili informaciju protivno odredbama Zakona o zaštiti ličnih podataka

POGLAVLJE V – NADZOR NAD PRIMJENOM KODEKSA

Član 14.

Obaveznost poštivanja standarda i principa iz ovog Kodeksa

Izabrani vijećnici će se uzajamno podsjećati i pozivati na obaveznost poštovanja principa ponašanja utvrđenih ovim Kodeksom i Poslovníkom Općinskog vijeća.

Predsjedavajući Općinskog vijeća će sa najvećom mogućom pažnjom pratiti ostvarivanje principa utvrđenih ovim Kodeksom i biti će ovlašten u svakom momentu upozoriti na obavezu ponašanja u skladu sa Poslovníkom Općinskog vijeća i ovim Kodeksom.

Član 15

Svrha sankcionisanja

Vijećnik koji prekrši neku od odredbi ovog Kodeksa, biće podvrgnut utvrđivanju odgovornosti, a na način i po postupku propisanom ovim Kodeksom.

Svrha sankcionisanja je osuda neprihvatljivog ponašanja koje je u suprotnosti sa ovim Kodeksom, a što ima preventivni moralni uticaj na buduće korektno i odgovorno ponašanje vijećnika, kao i razvijanje društvene odgovornosti.

Član 16.
Etički odbor

Sa svrhom osiguranja primjene ovog Kodeksa, Općinsko vijeće formira poseban Odbor za Kodeks ponašanja vijećnika (u daljnjem tekstu: Etički odbor)

Etički odbor prati primjenu Kodeksa, postupa po pojedinačnim prijedlozima za utvrđivanje postojanja povrede Kodeksa, podnosi izvještaj Općinskom vijeću s preporukama i ima druga ovlaštenja utvrđena ovim Kodeksom.

Etički odbor čine po jedan predstavnik svakog od političkih subjekata, koji participiraju u Općinskom vijeću ili predstavnik nezavisnih vijećnika u Općinskom vijeću, ako su izabrani shodno Izbornom zakonu.

Etički odbor radi bez naknade.

Etički odbor donosi svoj Poslovnik o radu.

Administrativno-tehničke poslove za potrebe Etičkog odbora obavlja Stručna služba Vijeća.

Član 17.
Procedura utvrđivanja odgovornosti

Etički odbor radi po prijavama.

U prijavi će obavezno navesti za koje radnje smatra da predstavljaju povredu Kodeksa i dokaze kojima to potvrđuje.

Etički odbor razmatra prijavu i ovlašten je provesti postupak ispitivanja osnovanosti prijava, provesti potpuni dokazni postupak i nakon toga odlučiti postoji li povreda neke od odredbi Kodeksa.

Ako Etički Odbor zaključi da nije bilo povrede odredaba ovog Kodeksa o tome će obavjestiti podnositelja prijave.

Ako Etički odbor zaključi da je određeni vijećnik učinio povredu neke od odredbi ovog Kodeksa, Općinskom vijeću Tuzla će podnijeti detaljan izvještaj s preporukom i nacrtom odluke o povredi odredaba ovog Kodeksa.

Općinsko vijeće prihvata ili ne prihvata preporuku Etičkog odbora o povredi odredaba Etičkog kodeksa sa izrečenom mjerom.

Ako prihvati preporuku o izricanju mjere za povredu Kodeksa vijećniku, donosi odluku, čiji nacrt izrađuje Etički odbor uz pomoć Stručne službe Vijeća.

Član 18.
Mjere

Mjere za povredu odredbi ovog Kodeksa su:

- opomena,
- javna opomena na sjednici Općinskog vijeća.

POGLAVLJE VI – OBJAVLJIVANJE I STUPANJE NA SNAGU

Član 19.

Svojim aktivnostima izabrani predstavnici-vijećnici će osigurati promociju ovog Kodeksa u javnosti i medijima.

Ovaj Kodeks će se objaviti u «Sl.glasniku općine Tuzla» i na web stranici općine Tuzla: www.opstina.tuzla.ba.

Član 20.

Ovaj Kodeks stupa na snagu osmog dana od dana objavljivanja u «Službenom glasniku općine Tuzla».

OPĆINA TUZLA
Općinsko vijeće
Broj: 01-05-2314-2012
Tuzla, 28. 03. 2012, godine

P R E D S J E D A V A J U Ć A

Prof.dr.med.sci.Nada Mladina